

Seccion Special
DIARIO

HUBENTUD *den Movecion*

Chanelle Fortin:

CU UN PRECIOSO SMILE, UN SHOW SENCIYO Y POCO GASTO EL A LOGRA DI WORDE CORONA "REINA INFANTIL DI CARNAVAL 2001"

Seccion Hubentud den Movecion a ricibi bishita di nos amigo Ferdinand Franca acompaña pa e precioso Chanelle Fortin, Reina Infantil di Carnaval 2001, ken representando e grupo San Nicolas Uni, a logra di conquista e corona pa su distrito, cu un show simple pero bunita, un speech adaptado na su edad y sin duda, su sonrisa encantador.

Manera ta conoci, Chanelle tin siete aña di edad y e ta bayendo Colegio Santa Philomena Eerste Klas.

Ferdinand Franca, miembro di e Grupo San Nicolas Uni, y motor tras di e grupo su actividadnan di carnaval, a conta na nos seccion, un tiki di loke a sosode prome cu Chanelle a sali elegi como reina infantil.

"Despues di dos siman di preparacion Chanelle a worde designa pa e grupo San Nicolas Uni como nos representante infantil. El a keda na mi encargo pa prepara tur cos. Mi a acerca su mayornan pa asina purba di traha riba e diseño di e paño, speech y e show, ya cu mi tin experiencia organizando actividadnan pa eleccion di reina", Ferdinand a comenta.

Tur e preparacion di Chanelle a worde haci conhuntamente cu su mayornan, loke sigur a yuda e mucha sinti su mes hopi mas sigur. Di ey Chanelle a cuminsa train tur dia durante pause na school; e tabata bisa su speech bise na diferente mucha, y a traha hopi riba un bon entonacion y gestonan cu su man.

Pa loke ta e show Ferdinand a hacie conhuntamente cu Goyo y Josey Kock ken a hinca un cantica na su tema cu tabata un finca. Asina aki Chanelle e trece algo innovativo pa canta ora di su presentacion.

"E preparacion di e bailenan a bay mas tanto cu entrenamiento na YMCA, y Chanelle tabata entrena cu su gruponan di baile cu en total tabata tres. Nan a train

riba cada un cantica ya cu nan kier a hinca cantica di carnaval tambe aden", Ferdinand a conta nos.

PERO, CON E EXPERIENCIA AKI TA PA CHANELLE MES?

Aunque Chanelle no tin hopi gana di papia awe, ta smile e ta smile mas tanto, pero tog nos a logra algun contesta for di dje.

HUB.MOV: -Ta dushi pa bo como mucha participa pa Reina Infantil?-

Chanelle: "Si. Mi a gusta tur loke mi a pasa aden".

HUB.MOV: -Ken a bin cu e idea pa bo representa San Nicolas Uni?

Chanelle: "Mi mes kier a bay pa reina".

HUB.MOV: -Ki bo a sinti ora bo a ser elegi como Reina Infantil di Carnaval 2001?-

Chanelle: "Ora mi el a yega Stadion mi a haci tur mi esfuerzo cu e deseo cu mi ta bay gana, pasobra mi tabata bon prepara. Mi a bira hopi contento y emocionado, pasobra tur otro mucha tambe tabata bunita y bon prepara".

HUB.MOV: -Bo tabata nervioso ora bo a papia dilanti hurado y e publico?-

Chanelle: "No. Mi no a sinti nervio ora mi a duna mi speech".

HUB.MOV: Bo ta sinti un tiki cansa despues di e dianan aki cu a bay den e paradanan?-

Chanelle: "No, mi no ta sinti cansa pasobra mi ta haciendo algo cu mi gusta".

HUB.MOV: -Bo ta gusta con bo paña a keda traha?-

Chanelle: "Si. E diseño di paña ta loke mi tabata kier. Ferdinand Franca ta hopi satisfecho cu e logro aki, pasobra Chanelle a haci su best, sin perde school y sin laga huiswerk un banda.

Hubentud den Movecion a pidi Chanelle conta nos algo di esey:

"Mi ta yega fo'i school baña, come, haci mi les y prepara pa bay entrena. Ferdinand mes tabata busca

mi".

Tambe nos a puntre kico e ta kere a conquista e hurado cu a scoge pa ta e Reina Infantil.

"Mi ta kere cu mi smile ta loke e hurado a gusta mas", el a expresa.

A keda atras caba e prome siman cu Chanelle a honra su corona. El a desfila den e Parada di Luz na San Nicolas y esun di Playa, e carnavalnan di mucha y den fin di siman cu ta bin, e lo participa den parada grandi na San Nicolas y na Playa.

HUB.MOV: -Durante e paradanan kico bo ta haci pa gana e publico- chanelle: "Mi ta gusta saluda e publico semper cu smile na mi cara".

HUB.MOV: -Calor, no ta cansa bo un tiki?-

Chanelle: "Ora cu solo ta baha pisa riba nos si bo ta sinti malo un rato cu dolor di cabes, pero ora solo a baha mi a sigui goza cu Claudius y Oreó".

Ferdinand a sigui, y el a menciona cu enberdad ora solo ta baha pisa riba e muchanan nan ta haya dolor di cabes, pero ora solo baha y atardi ta fresca un poco, e muchanan ta haya animo bek.

Den number di Chanelle y di Grupo San Nicolas Uni, Ferdinand kier a gradici e gran apoyo cu Chanelle a haya door di e publico cu a bin bin stadion, cu ta duna aplausonan caluroso, cada vez cu e ta pasa den e parada.

Chanelle awor si kier bay cerca su mayornan cu ta wardando den otro oficina di DIARIO. Ah, pero e no kier a bay pafu di nos oficina sin manda un mensahe:

"Muchanan sa di goza carnaval. Laga mayornan hiba boso, y participa den parada pa engrandece carnaval di mucha na Aruba, pero corda bon no cana bay leu for di bo mayornan!"

Ferdinand a tuma over loke ta falta pa bisa, y el a comenta cu algo cu ta hopi bunita ta union cu Chanelle



a trece den e Carnaval 2001.

"Nos por a aprecia diadomingo cu e reina hube-nil y e prome finalista di reina infantil tabata riba e carozha hunto cu Chanelle, y esey ta muestra cu Chanelle ta purba di trece union di tur e distritonan y pa asina e reinanan no ta wak otro como rival, pero como amiganan".

Ferdinand ta haya cu asina mester sigui tambe den tur competencia di reina, cu nan mester ta uni envez di pleita otro.

"Mayoria di biaha muchanan sa di diverti den carnaval pero cierto adultonan no sa di tin union entre nan mes y ta trece conflicto den carnaval", Ferdinand a expresa.

Ferdinand a duna un conseho pa organizadornan di eventonan asina, y esey ta cu mester purba muestra semper den eleccion di reina infantil e esencia di un mucha. Pa e eleccion ta un union di tur e candidatanan y tambe cu ta purba di tene mas mucha cu ta posible, door di baha e gastonan di e shownan y laga e mucha mes saca su talento, canta y balia su cantica, laga e prepara su show. Asina e ta sa di diverti mas durante su show cu si ta algo prepara pa otronan, cu e no ta participa activamente di dje".

GRADICIMENTO:

Ferdinand: "Palabranan di gradicimento ta bay claro na

prome lugar na Dios cu a duna Chanelle e oportunidad pa sali reina,

na e mayornan cu a pone e confianza den mi persona pa train Chanelle, na Goyo cu a sa di hinca un tremendo letra y ritmo den otro, na Josey Kock y su famia cu a sa di yuda mi te ultimo momento cu tur e preparacionnan, na famia di Arlene Kock, na San Nicolas Uni, y tur hende cu di un of otro manera tabata tin di haber cu e respaldo pa e mucha.

Na su cosedor Hipolita, su estilista Gorgie, na John John Fleming, y e bailadornan di e tres gruponan di baile cu a sa di duna un tremendo show".

MENSAHE:

Ferdinand: "Ban purba uni mas den carnaval, yuda otro pa asina tin mas participante durante eleccion di reina. Tur ora ta e gasto di e organizacion ta spanta e mayornan. Pero manera mi a priminti e mayornan di Chanelle cu nos ta bay haci un show simple y cu no ta bay tin hopi gasto implica. Esey nos mester purba di nos tene simple y laga e mucha sa di saca tur su potencial afo, y durante e parada laga nos tur elogia e reina saliente y tambe tur e otro reinanan, cu cada un ta keda e reina di nan distrito y no converti carnaval den algo materialista, pero den un tradicion pa un y tur diverti sanamente".